



Anwar menyaksikan al-Quran yang siap dicetak untuk diedarkan selepas merasmikan Solidariti Wakaf Sejuta al-Quran dan Majlis Penghantaran Tiga Kontena di Kompleks Nasyrul Quran, Putrajaya, semalam.

(Foto Hazreen Mohamad/BH)

Edar sejuta al-Quran cara negara kita memaknai Islam

Langkah sebar kefahaman ke seluruh dunia dapat tangani Islamofobia

Oleh Mohd Iskandar Ibrahim
mohd_iskandar@bh.com.my

Putrajaya: Langkah kerajaan mencetak sejuta naskhah al-Quran dan terjemahan untuk diedarkan ke seluruh dunia, menjadi gagasan penting dalam memaknai Islam, kata Datuk Seri Anwar Ibrahim.

Perdana Menteri berkata, usaha itu penting bagi memberi makna kepada penghayatan Islam, yang secara langsung memartabatkan umat dan negara ini.

"Ini adalah respon kepada apa yang dikatakan Islamofobia dan sikap permusuhan sehingga berlaku pembakaran al-Quran yang menyentuh hati nurani Islam.

"Cara kita menjawabnya dengan menyebarkan al-Quran hingga ke Sweden dan (negara) Barat lain," katanya berucap menyempurnakan perasmian Solidariti Wakaf Sejuta al-Quran dan Majlis Penghantaran Tiga Kontena di Nasyrul Quran, di sini, semalam.

Perdana Menteri sebelum ini dilaporkan berkata, Malaysia akan mencetak dan mengedar sejuta naskhah al-Quran ke seluruh dunia, sebagai tindak balas terhadap pembakaran kitab suci

umat Islam itu.

Beliau berkata, pendekatan itu lebih berfaedah sebagai langkah menyebarkan kefahaman mengenai al-Quran supaya kandungannya dapat dihayati semua pihak tanpa mengira latar belakang fahaman dan agama.

Malah, kerajaan turut menyumbang RM10 juta kepada Yayasan Restu bagi pendedaran segera cetakan 20,000 naskhah terjemahan al-Quran.

Elak wujud percaturan

Anwar berkata, pemahaman al-Quran dalam kalangan umat Islam dan bukan Islam harus dipertingkatkan bagi mengelak wujud percaturan yang boleh membawa kepada kejahilan.

Beliau berkata, penentangan terhadap Islam dan al-Quran adalah disebabkan kejahilan yang tebal dan permusuhan warisan sejak zaman penjajahan hingga wujudnya gerakan Islamofobia.

"(Namun, ada segelintir) ... kita dengan penuh bersemangat dan kadang-kadang dengan laungan membicarakan Islam sehingga memaki hamun tanpa ada usaha mendidik serta memberi kefahaman (mengenai Islam).

"Sebab itu saya cuba mengungkapkannya dalam MADANI, walaupun ia merangkul soal negara, tata kelola, kemampanan ekonomi, ihsan dan amanah, tetapi soal nilai akhlak menjadi teras untuk agama khususnya al-Quran," katanya.